

Exitoso homenahe na Robert Jeandor

Durante show Cultural na Playa Pabao



ORANJESTAD (AAN): Riba Dia di Himno y Bandera directiva di Centro di Bario Playa Pabao a organiza un show cultural. E actividad cultural a cuminsa cu presentacion di Super Dancers pa despues sigui cu e baile di sinta di sr Mimi Kock. Sra Olga Buckley tabata presente y a comparti su

inspiracion cu e publico presente cu a bin na gran escala.

Esnan cu tambe a duna nan prestacion tabata Kenduard Henriquez ganador infantil di un canto pa nos Himno Bandera y e ganador hubenil Mitchell Tromp. Otro cantante cu tabatin un

presentacion sublime tabata Jerino Ridderstaat cu a recibi un aplauso grandi di e publico na momento cu el a presenta su cancion di aña pasa. Gruponan di baile cu a sigui tabata e atistanan di Playa Pabao esta e muchanan di Anglo Kleuterschool, Grupo Fofoti, Klompi Sucu y Chaz Dancers.

Pues un programa hopi varia cu canto, baile e poesia. Despues di e show cultural e momento a yega pa entrega na Robert Jeandor e premio "Cultural Playa Pabao 2009". Sr. Dennis Burke presidente di Centro di Bario Playa Pabao a haci e entrega di un boto miniature cu ta tipifica e bario di Pabao. E anochi a termina cu Robert y Su Solo Banda Show tocando un set di un ora y mei na unda publico por a baila y ta logico cu "Bolobonchi" no por a keda fo.

